

TARIKH : 15 FEBRUARI 2023
AKHBAR : BERITA HARIAN
MUKA SURAT : 4

Subsidi bersasar berasas pendapatan boleh belanja

Subsidi bersasar berasas pendapatan boleh belanja

Kuala Lumpur: Kerajaan sedang merangka pendekatan subsidi secara bersasar dengan menjadikan pendapatan boleh belanja isi rumah sebagai asas utama.

Menteri Ekonomi, Rafizi Ramli, berkata melalui kerajaan tidak lagi melihat kepada asas pendapatan isi rumah semata-mata, sebaliknya turut mengambil kira beberapa faktor dalam menentukan pendapatan boleh belanja.

“Semua ini akan mengambil kira perubahan struktur pendapatan dan perbelanjaan, kos sara hidup, kuasa beli, demografi serta lokasi isi rumah.

“Semua ini penting supaya le-

bih tepat untuk kita tentukan (kedudukan isi rumah bagi tujuan pendekatan subsidi secara bersasar) kerana T20 di satu tempat, mungkin (statusnya) M40 di tempat lain,” katanya menjawab soalan lisan Datuk Seri Jalaluddin Alias (BN-Jelebu) mengenai pecahan terkini garis pendapatan rakyat Malaysia, selain langkah yang diambil kerajaan bagi membantu golongan M40, yang dikatakan kini menjadi M70.

Dalam pada itu, Rafizi turut mengesahkan kerajaan melalui Jabatan Perangkaan sedang memuktamadkan dapatan Survei Pendapatan, Perbelanjaan dan Kemudahan Asas 2022 yang mem-

babitkan 92,000 isi rumah bagi tempoh antara Januari hingga Disember 2022.

Bangunkan infrastruktur data

Beliau berkata, dapatan survei itu penting untuk membantu mengemas kini had pendapatan isi rumah di negara ini, sekali gus memudahkan kerajaan merangka pendekatan subsidi lebih bersasar seperti dirancang.

“Kita sedang bangunkan infrastruktur data (melalui dapatan survei terbabit) untuk bersiap sedia ke arah itu,” katanya.

Rafizi berkata, ketika ini isi rumah Malaysia dikelaskan kepada tiga kategori kumpulan

pendapatan utama.

Ia membabitkan B40 yang berpendapatan bulanan kurang RM4,850 dan meliputi 2.91 juta isi rumah; M40 yang berpendapatan bulanan antara RM4,850 dan RM10,959 meliputi 2.91 juta isi rumah serta T20 yang berpendapatan bulanan RM10,960 dan ke atas meliputi 1.46 juta isi rumah.

Mengenai soalan berkaitan kelompok M40 yang turut memerlukan penelitian dan bantuan kerajaan, Rafizi mengakui tidak boleh lagi melihat secara umum kelompok pendapatan isi rumah sama ada kategori B40, M40 atau T20.